



Inatsisartunut ilaasortaq, Jens-Frederik Nielsen, Demokraatit  
Maani/

### § 37 naapertorlugu apeqquummut 138/2022-mut akissut

11-07-2022  
Sags nr. 2022-14219  
Dok. nr. 20605817

Inatsisartut suleriaasianni § 37, imm. 1 naapertorlugu Naalakkersuisunut apeqquteqarputit. Apeqqutitit immikkoortunnit akineqartussanngortinneqarput.

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apnn@nanoq.gl  
www.naalakkersuisut.gl

1. Kalaallit Nunaanni Aalisarsinnaanermut Akuersissutinik Nakkutilliisoqarfik, Issittumi Sakkutooqarfik, Kalaallit Nunaanni Politiit aammalu Unnerluussisussaataitaasut Aalisarnermut Inatsi atuutsinneqarnissaanut nakkutilliinermut suliaqartoqartillugu oqartussat akunnerminni suliassat agguataarsimanerat Naalakkersuisut ersarissarsinnaanerlunikku?

**Akissut:** Aalisarneq pillugu Inatsisartut inatsisaanni nr. 18, 31. oktober 1996-imeersumi kingusinnerusukkut allannguuteqartumi kapitali 11-mi aalisarneq pillugu inatsisit eqqortinneqarnissaannik oqartussat nakkutilliinissaannik piginnaatitsineq aalajanger-sarneqarpoq.

Kalaallit Nunaanni Aalisarsinnaanermut Akuersissutinik Nakkutilliisoqarfik (KANUAANA) aalisarneq pillugu inatsisit aamma piniarneq aallaaniarnerlu pillugit inatsisit eqqortinneqarnerannik nakkutilliisuvoq. KANUAANA nunami immamilu taamatut nakkutillisarpoq aammalu nakkutilliineq najuullunilu nakkutilliineq uppersartarlugit. Assersuutigalugu KANUAANA aalisarneq pillugu inatsimmi § 27, imm. 3, 4 aamma 5 naapertorlugit aalisariutinut angallatinullu aalisakkanik assartuutinut pisanik aalisarnermilu atortunik misissuinissaq siunertaralugu eqqartuussiviit akuersitinnagit ikisinnaavoq.

Arktisk Kommando (sakkutuut aalisarnermik nakkutilliisoqarfiat) aalisarneq pillugu inatsimmi § 28, imm. 1 aamma 2 naapertorlugit eqqartuussiviit akuersitinnagit aalisariutit angallatillu aalisakkanik assartuutit sulineri iliuuseqarniarlutik unitsissinnaavaat ikiffigalugillu, tassunga ilanngullugit angallammut uppersartaatinik, aalisarnermi logboginik, usinik, tunisassianik naatsorsuinernik assigisaannillu nakkutilliineq aammalu aalisarnermi atortunik pisanillu misissuineq.

Kalaallit Nunaanni politiit aalisarneq pillugu inatsimmi § 28 malillugu Arktisk Kommando-tut piginnaatinneqarput. Kisiannili inatsisinik unioqqutitsisoqarnerannik pasitsaassaqaavilluni suliani taakku politiinit misissorneqassapput aammalu Kalaallit Nunaanni Politiinit eqqartuussisoqarnermi sulineq pillugu inatsimmi malittarisassat malillugit unnerluussisarnermi suliataq suliarineqartassallutik. Tamanna pisassaaq Arktisk Kommandomi immikkoortortaqaarfiit aalisarnermik nalinginnaasumik

misissuereerneratigut unioqqutitsisoqarsimasinnaaneraniillu paasisaqartoqareerneratigut, Arktisk Kommando-llu tamassuma kingorna Kalaallit Nunaanni Politiinut attaveqareerneratigut. Unioqqutitsinerit aamma KANUAANA-mit paasineqarsinnaapput, suliamilu tamassuma kingorna politiinut unnerluutiginnilluni.

2. Oqartussat ataasiakkaarlugit nakkutilleeriaatsit suut aammalu qanoq pisoqartillugu nakkutilliinerit suliarisassaneraat Naalakkersuisut ersarissaasinnaanerlutik?

**Akissut:** Apeqqut 1-imut akissut innersuussutigivara.

- a. Aalisarnermut Inatsi atuutsinneqarneranut allanik aamma nakkutilliisoqarsimappat apeqqut normu 2 assigalugu Naalakkersuisut ersarissaaqquneqarput.

**Akissut:** Oqartussat allat aalisarneq pillugu iantsimmik nakkutillinnermi akuuneq ajorput.

3. Kalaallit Nunaanni Aalisarnermut Akuersissutinik Nakkutilliisoqarfik ilumut namminneerlutik aalisariutinut ikisinnaanissamut pisinnaatitaanersut Naalakkersuisut immikkut paasissutissiisinnaanerlutik?

**Akissut:** KANUAANA aalisarneq pillugu inatsimmi § 27, imm. 3, 4 aamma 5 naapertorlugit pisanik aalisarnermilu atortunik misissuinissaq aamma angallatip aalisarsinnaanermut akuersissutaanik misissuinissaq siunertaralugit aalisariutinut angallatinillu aalisakkanik assartuutinut eqqartuussiviit akuersitinnagit ikisinnaavoq. KANUAANA taamaalilluni aalisariutinik Kalaallit Nunaanni aamma Kalaallit Nunaata aalisarnermi oqartussaaffiani aalisartunik tamanik nakkutilliisinnaavoq, tassungalu atatillugu angallatit immamiinnerat umiarsualivimmiinneralluunniit apeqqutaatinnagu eqqartuussiviit akuersitinnagit aalisariutinut tamanut aamma ikisinnaalluni.

Inussiarnersumik inuulluaqqusillunga



Karl Tobiassen

Aalisarnermut Piniarnermullu Naalakkersuisoq